

## ■ GLOSSA

## Romontsch ei in event

DA GION CAVIEZEL

**J**eu sun el tren. Oz eri veramein knapp. Ei ruc-la e zucla tras la notg. Sun aunc miez el delirium, patratgs sco utschals, ier sera trash TV and trash talking: Bloody early in the morning and dark like mes siemis. Hi guys what's going on. Are you ready?

**N**a, insumma buc. Staunchels sundel, mintga gi stoi lavar da quellas uras. Miu tgau batta alla finiastra, davostier audel jeu in pèr plaids romontschs: «...ir a Berna, il romontsch ei quasi morts, ei drova ussa la politica...»

**J**eu teidlet cun bucca e nas, mo ina classa da scholars fa canera, els han pintgas pistolas d'aua, in scolast fa pscht, pscht. Ussa vesel jeu in pèr umens che van tras il vagun, vestgi sco miu tat: camisch'alva, in libroc stgir, in tschiep ner ed ina capiala grischa.

**R**egurdientschas d'in vitg e d'in temps ch'ei dat buca pli. Ed el medem temps displascher ch'ei dat tut quei buca pli: enzerdar il fein, rimnar ensemen las bulomas (tatta ha getg che quellas bulomas seigien tis-



si per las vaccas), vischigias dil rischlar, purtar ponns, far fiug ella fueina si mises. Ell'umbriva dalla hetta dev'ei adina in te cauld. Oz sai jeu che tatta ha adina mess in tec vin tgietschen ella bubronda. En mintga cass vevan nus fetg bugen quei te. Sco marena dev'ei truffels ni pulenta fatg sur il fiug. Igl ei vargau.

**N**us stuein s'adattar al temps niev.» Quei ei la vusch d'anson. Igl um che s'auda alla vusch sesa visavi mei. El vesa ora sco in business men, el ha in pin dalla Lia Rumantscha sil revers e mira cun ina egliada pitgiva directamein en miu tgau.

**N**us stuein far projects, nesser ellas medias svizras, meglier aunc ellas medias internaziunalas. Jeu sedamondel sch'il romontsch seigi in business.

**E**l ha legiu mes patratgs: «Naturalmein. Nus duvrein daners. Per far acciuns cun taccaders ed autras caussas. E daners dat ei mo per events ni projects. La muneida dad oziligi ein ils «I like it polischs» sin facebook. La valuta d'aur ein ils clicks dalla pagina da web. Aschia ei quei!»

**E**l enclina il tgau e bisbigliescha: «Ussa sas ti ir a registrar per tiu lungatg. Ti survegns in diplom ed in bul. Aschia eis ti in Romontsch diplomau.»

**C**heu vegn quei um che vesa ora sco miu tat e peglia miu t-shirt. Ussa vegn el a gir che jeu duessi ir vid la lavur e buca passar miu temps cun tuppaddas. Endstation. Aussteigen bitte.

**J**eu sestermentel, in um cun in vestgiu oransch, staziun finala. Negin sesa visavi mei, era miu tat ei stau ina hallucinaziun. Jeu enconuschel igl accent, in um dalla Surselva, probabel da Trun.

**S**chon bien», gitgel jeu, «hai mo giu in curios siemi.»

[www.gioncaviezel.ch](http://www.gioncaviezel.ch)